



## Groupe parlementaire

Här Fernand Etgen  
President vun der Deputéiertechamber  
19, um Krautmaat  
L-1728 Lëtzebuerg

Lëtzebuerg, den 21. September 2022

Här President,

esou wéi d'Chambersreglement et virgesäit, bidden ech lech, dës parlamentaresch Fro un den Här Staatsminister, den Här Bausseminister, den Här Ekonomiminister an d'Madamm Finanzminister weiderzeleeden.

Am Kader vun de Sanktiounen déi säit dem 24. Februar dëst Joer, vun der EU, dem Vereenegte Kinnekräich an de Vereenegte Staaten géint déi russesch Federatioun erlooss goufen, goufen och eng Rei Verméigenswäerter vu russesche Privat- a moralesche Persoune beschlagnaamt. Am Artikel "Les sanctions au regard du droit" deen den 2. September am Lëtzebuurger Land publizéiert gouf, gëtt d'Fro opgeworf, ob déi genannte Sanktioun konform zu enger Rei bilateralen Investitiounsschutzofkommes stinn a vun de Sanktiounen betraffe physesche a juristesche Persoune déi responsabel Staate méiglecherweis iwwert de Wee vun internationale Schiedsgeriichter ëm Indemnitéite kéinten usichen. Am Fall vu Lëtzebuerg kéint esou eng Situatioun potentiell aus dem Investitiounsschutzofkommes vun 1989, souwéi aus der Energiecharta ervirgoen.

An der Äntwert op meng parlamentaresch Fro Nummer 6613 schreift d'Regierung zu der Legalitéit vun de Sanktiounen, déi säit dem 24. Februar vu Säite vun der EU géint déi russesch Federatioun verhaange goufen, dat hei: "*Zënter der russescher Agressioun géint d'Ukrain sinn dës Sanktiounen a bis elo 7 successive Päck verschäerft ginn. Méi spezifesch sinn d'EU-Reglementer 269/2014 an 833/2014 iwwerschaaft ginn. Et ass och nach e spezifesch Regimm fir déi zwou besaten Oblasten Donetsk a Luhansk dobäikomm dee wirtschaftlech Restriktiounen fir dës Regiounen virgesäit:*

- *EU-Reglement 263/2022 betreffend restriktive Moosnamen als Äntwert op d'Unerkennung vun den net-Regierungskontrolléierte Gebitter vun den ukrainesche Regiounen Donetsk a Luhansk an den Uerder un d' russesch Arméi an dës Géigenden anzefalen*

*Et handelt sech am EU-Reglement 269/2014 ëm individuell Sanktiounen déi en Afréieren vum Verméigen an e Reesverbuert virgesinn, souwéi ëm wirtschaftlech Sanktiounen am EU-Reglement 833/2014. Zilgruppe vun individuelle Moosnamen sinn am Artikel 3 vum EU-Reglement 269/2014 festgeluecht.*

An deem Zesammenhang géif ech der Regierung gär dës Froe stellen:

- 1) Kann d'Regierung matdeelen, ob d'Lëtzebuurger Participatioun un deenen zitéierte Sanktiounsregimmer vun der EU op hir Konformitéit zu deene verschiddenen Investitiounsschutzofkommes mat der Russescher Federatioun juristesche gepréift gouf a wéi eng Erkenntneser dobäi fonnt goufen?

- 2) Kann d'Regierung matdeelen, ob déi Lëtzebuerger Participatioun un deenen zitéierte Sanktiounsregimenter vun der EU op hir textuell an normenhierarschesch Konformitéit zu weidere Bestëmmunge vum Vëlkerrecht gepréift gouf a wéi eng Erkenntnesser dobäi fonnt goufen?
- 3) Kann d'Regierung matdeelen, wéi eng Staaten, Organer, Institutionen oder aner Organisatiounen (och privater Natur) am Kader vun der Opstellung vun dese Sanktioune responsabel waren, fir eng "Schold" vu physischen oder juristesche Persoune feststellen op där hirer Basis si sanktionéiert goufen? Kann d'Regierung präziséieren ob zu dese "Feeler" och den Émstand kann zielen, gutt oder no Relatiounen zu der russescher Administratioun ënnerhal ze hunn, déi sech fir de Fonctionnement vum Geschäftsliewen a kengem Land wuel ganz vermeide loossen? Wa jo, wéi gëtt des Proximitéit am Sënn vun enger Schold genee definéiert?
- 4) Kann d'Regierung elaboréieren, op wéi eng Manéier séchergestallt ass, datt am Kader vu Sanktioune virleefeg confisquéiert materiell Gidder kee Wäertverloscht erliden, ob wéi eng Manéier dese festgestallt an dokumentéiert gëtt, an zu wem senge Laaschten de Schued geet, wann déi entsprechend Gidder eng Kéier un déi ursprénglech Proprietären zeréck ginn?
- 5) Kann d'Regierung elaboréieren, wéi eng Haftung dem Staat kann entstoen, falls confisquéiert finanziell Gidder e Wäertverloscht erliden, deen ze vermeide gewiescht wier, wann se am Besëtz vum urspréngleche Proprietär bliwwen wieren? Kann d'Regierung präziséieren ob an op wéi enger Berechnungsgrondlag de Proprietär vun de confisquéierte finanzielle Gidder, Indemnitéite fir potentiell net realiséierte Beneficer géintwärt dem Lëtzebuerger Staat kann an Usproch stellen?
- 6) Kann d'Regierung ënnert dem Respekt vum Dateschutz matdeelen, ob a wa jo iwwert wéi ee Wee opgrond vun de genannte Sanktioune bis ewell Schuedensatzspréich géint de Lëtzebuerger Staat virbruecht goufen? Kann d'Regierung präziséieren ob et sech bei den Auteuren vun dese Prozesser ëm physisch an/oder juristesche Persoune handelt?
- 7) Kann d'Regierung matdeelen, wéi si den Imageschued vun deene genannte Sanktioune fir d'Finanzplaz an den Investitiounsstanduert Lëtzebuerg beurteilt, wa Privatleit hei Gefor lafen, am Kader vu politesche Sanktioune zu all Ablack kënne geschiedegt oder enteegent ze ginn?

Mat déiwem Respekt,



Fernand Kartheiser  
Deputéierten



**Gemeinsam Äntwert vum Aussen- an Europaminister Jean Asselborn, vum Wirtschaftsminister Franz Fayot a vun der Finanzministesch Yuriko Backes op d'parlamentaresch Fro no. 6879 vum 22. September 2022 vum honorabelen Deputéierten Här Fernand Kartheiser**

EU-restriktiv Moosnamen sinn en Instrument vun der Gemeinsamer Aussen- a Sécherheetspolitik (CFSP). Si sinn präventiver Natur an hunn als Zil fir d'gemeinsam Objektiver ze fërderen déi am Lissabon Vertrag festgeluecht gi sinn.

EU Sanktiounen gi vum Rot vun der Europäescher Unioun ugeholl, deen duerch Unanimitéit op Basis vun gemeinsam preparéierten Dossieren Entscheedungen hëlt.

EU restriktiv Moosname sinn am Aklang mam Vëlkerrecht, souwéi mat den internationale Mënscherechtsobligatiounen.

Si sinn esou konzipéiert fir negativ Konsequenzen ze minimiséieren fir déi, déi net verantwortlech sinn fir d'Politik oder d'Handlungen, déi zu der Adoptioun vu Sanktiounen gefouert hunn. Et gëtt am Besonneschen drop Wäert geluecht fir d'Konsequenzen op déi lokal Zivilbevëlkerung oder op d'legitim Aktivitéiten, déi am oder mat deem betroffenen Land duerchgefouert ginn, ze minimiséieren.

EU Moosname sinn ausserdeem administrativer an net strofrechtlecher Natur. An deem Kontext ass ervirzehiewen dass am Kader vun den individuellen Sanktiounen Verméigen agefruer gëtt an net enteegent gëtt.

Deementspriechend sinn och d'Revendicatiounen déi kéinten op der Basis vun engem Investitiounsschutzofkommen opbruecht ginn limitéiert. Prinzipiell ass net auszeschléissen datt en Investisseur kéint géint Memberstaaten virgoen. D'Analyse vun dësen Aspekter, déi zesummen mat den EU Institutiounen an den aneren Memberstaaten diskutéiert goufen, huet e Succès vun esou Prozeduren awer als net warscheinlech ageschat. Et goufen bis ewell och keng Schuedensersatzfuerderungen géint Lëtzebuerg opbruecht, weder am Kader vun den aktuellen Sanktiounen géint Russland, nach a fréieren Sanktiounsregimer déi Lëtzebuerg iwwert déi leschte Joer ëmgesat huet.

Mir weisen den honorabelen Deputéierten ausserdeem op eis Äntwert op d'parlamentaresch Fro N° 6613 hin an där déi reegelméisseg Iwwerpräiwung vun den Sanktiounsregimer an d'Rechter vun de sanktionéierte Persounen an Entreprises duergeluecht goufen. Sanktionéiert Persounen an Entreprises hunn d'Méiglechkeet hir Observatiounen un de Rot vun der Europäescher Unioun ze schécken an d'Sanktiounen, dorënner hir Designatioun, virum Europäeschen Geriichtshaff a Fro ze stellen. Dowéinst gëtt d'Rechtssécherheet fir Investisseuren zu Lëtzebuerg och duerch dëse Sanktiounsregim net a Fro gestalt.

Wat den Image vun der Finanzplaz ugeet, esou ass et am Interessi vun den Acteuren zu Lëtzebuerg Entschlossenheet an der Adoptioun wéi och an enger effikasser Ëmsetzung vun



Sanktiounen géint Staaten a Persounen ze weisen, déi géint Wäerter vun der Unioun oder d'internationaalt Recht verstoussen. Et gëtt och drun erënnert datt d'Sanktiounen géint Russland d'Resultat sinn vun enger enker Koordinatioun um internationalen Plang mat den enkste Partneren vun der EU. Bis dato goufen 5,5 Milliarden Euro un Avoiren agefruer, wat weist, datt Lëtzebuerg säi Rôle an der Ëmsetzung vun den EU Sanktiounen spillt.

Lëtzebuerg, den 25 Oktober 2022

Den Aussen – an Europaminister

(s.) Jean Asselborn